



# Daifim


An Official Organ of YMA, Khuangpuilam Branch.

## YMA MOTTO



Hunawl hman that  
Zofate hmasawna ngaihtuah  
Kristian nundan tha ngaihsan

Khawchin : Source - Accuweather.com



Ruah a sur rin a ni.  
Temp - Max: 30°C Min: 24°C  
Dar 4:48-ah ni a chhuak ang a,  
Tlai Dar 6:02-ah a tla leh ang.

Vol - VI Issue No. - 28

- Thiñin Thla -

2<sup>nd</sup> August, 2020 (Pathianni)

**Tunkar chang vawn : Thuf 4:23**  
“I thil ngaihtuah dânah fîmkhur  
hle la, I ngaihtuah chuan i nun a  
kaihrui thîn a ni. “

### TUALCHHUNG CHANCHIN

☛ Pu F. Lalbiaksanga, Leader, Chawngbawla section, nupui Pi Mami chuan ni 30 July, 2020 (Ningani) chhun dar 12:19 khan Durtlang damdawi inah fapa, Kg 2.850 a rit a nei. Zai chhuah a nih avangin hun engemaw chhung chu naute leh a nu hi Aizawl lamah an awm hrih dawn ni a hriat a ni. Fanau malsawmna an dawnah kan lawmpui tak meuh a ni.

☛ Pu Robert Zothansanga, Chawngbawla section te chhungkua chuan Auto thar an nei a, kan lawmpui takzet a ni.

☛ Pi Thartei (Excise), Judicial quartera awm te mikhuwal Rinsailovi (kum 40), Pi Lalrovi, Keifang chu a mu an kaitho zo lova, casualty panpui niin chawhma dar 11:00 vel khan a a thi a ni. Branch YMA-in a kuang siam sakín a ruang hi Keifangah lak chhoh a ni.

### Kan then tak

✝ Tv. Jonathan-a, kum 42 c/o Sangthankima, TNT, Kolasib chu District Hospital-ah Urosep-sis (Zunkawng nâ) natnain ni 28 July, 2020 (Thawhlejni) zanlai dar 12:20 khan a boral a. A tuk chawhma dar 10:00 khan TNT Biak Inah vui a ni.

A kalsan tak a chhung leh khat, a laina zawng zawngte'n Pathian awmpuina leh thlamuanna an dawn kan duhsak tak zet a ni.

### Chhiatni Fund pe zel tura ngenna

Hripui lengin harsatna tam tak a thlen avangin Chhiatni fund la pe lo kan la awm nual ni a hriat a ni a. Hun hian Branch inhlawhna leh sum luhna tur tam tak a dan tlat lain, Branch hmalakna tihtawp mai theih ani silo a. Chuvangin, chhiat tawh thilah sum sihchhuah mai tur a awm dawn loh avangin Chhiatni fund la pe lo te'n pe vek tura ngen kan ni. Branch O.B emaw Section O.B emaw min bialtute hnenah emaw pek tur a ni ang.

## District thar pathumah Y.M.A Sub-Headquarters din dawn

District thar pathumah YMA Sub-Headquarters din turin hmalakna kalpui mek a ni. Sub-Headquarters YMA din dan tur zirchiang tura Central YMA in a din, Study Group Convener Pu Lalnuntluanga, General Secretary, CYMA; Dr. Malsawmliana, Asst. Secretary, CYMA leh Group Member dangte chuan Hnahthial Sub Headquarters din dan tur chungchangah Hnahthial an tlawh a. Hnahthial District chhunga Group YMA hruaitute nen inkawmin, Study Group Convener Pu Lalnuntluanga chuan Central YMA chuan District thar pathum Hnahthial, Saitual leh Khawzawl-ah Sub-Hqrs hawn a remti tawh a, tum danah chuan kumin YMA Day hma khan din fel vek nise an tih laiin, hripui leng avangin duh angin hma an la chak thei lo ati a, district thar te tlawh chhuak vek tawhin, an report chu karleh Zirtawpni-a CEC meeting-ah pharhin, hripui dinhmun a zirin August thla velah chuan Sub Hqrs. hi hawn theih a nih a beisei tih a sawi.

Hetih lai hian Zirtawpni July 24, 2020 khan Saitual Group YMA Executive thukhawm chuan YMA Saitual Sub-Headquarters din a nih dawn tak avangin, Saitual Group YMA chu an thiat a, Central YMA Study team-te pawhin survey nei tawhin, kumin September thla ral hma ngeia Saitual Sub-Headquarters hi din hman a nih beisei a ni. Tunah hian Saitual District chhungah Group YMA 4 a awm mek a, Sub-Hqrs din hnuah chuan Group YMA thar 3 dang a pian theih beisei a ni bawk.

## Cyber Crime chungchanga Mizoram Police Thuchuah

Tunlai khawvel thiamna changkang chho zelah Mizoram-ah Cyber Crime lam case a tam chho telh telh a, a bik takin online-a sum inbumna lam complaint kan dawng chho ta zel a. Heng thilthleng ațanga Mizoram mipuite kan lo fimkhur theih nan a hnuaia tarlante hi zawm turin kan inchah e.

Online transaction lamah:

1. UPI hman Phone app (Gpay, Paytm, Freecharge, etc) hmangin i hmelhriat loh pawisa thawn suh, inbumna a tam.
2. I phone-ah heng UPI app i hmang a nih chuan, i phone chu i fate/tute, etc online games khelh nan hman tir suh. An tum leh hriat reng vang ni lovin an games khelh leh i UPI app an lo link palh thei a ni.
3. Online ah hian inbumna a tam a, "Special Offer", "Promotion", "Sale" tih lampang hmanga phone call emaw message i dawn chuan bawhzui loh a him ber.
4. App i hriat chian loh phone call emaw sms hmanga download tur an hrih che chuan inbumna a ni tih hria la, chutiang chu download miah loh tur a ni.

ATM Card leh OTP:

1. I ATM card chu tumah hman tir suh. ATM ațanga pawisa la chhuak turin kal thei lo pawh ni la, i mi rin ber pawh kha sum inrawlhnaah chuan a rintlak kher lo maithei.
2. I ATM card number emaw thlalak emaw (card number, CVV, expiry date lanna) tumah thawn suh. I lo thawn palh a nih chuan, i him zawkna'n i ATM card chu block-tir la, bank ah a thar dil leh rawh.

(Phek 2-na)

**YMA chu țanpui ngaite țanpuitu a ni. – YMA Kumpuan : Zirna uar**

Editorial Board :

Represent: Pu Rotlingpuia  
Editor: Pu Ricky MS Dawngzela  
Jt. Editor : Pu Lalsiamkima  
Treasurer: Nl. Florence Zoremsangi  
Cir.Manager: Tv. Samuel Lalpekhlua  
Contact No: 9862501858 / 9612691291  
9612761781 / 7005494983

FLS Station - 9612566886

Chawngbawla Section

Leader : Pu F. Lalbiaksanga  
96121 55162  
Secretary : Tv. R. Lalnuntluanga  
82599 60032

Vanapa Section

Leader : Pu Lalchualova  
87300 99599  
Secretary : Tv. Lallawmzuala  
87875 41803

Khuangchera Section

Leader : Pu Lalramzaua  
76408 95924  
Secretary : Pu Zachungnunga Hrahse  
76299 69989

Editorial.....

Mihring hi chungkuain a uap a, chu chungkua chu kohhran leh khawtlang, ramn a uap leh a. Chumi awangchuan mitinte hi kan inpheng tawon a, tumah hi kan inthlauh thlain kan inhlamchhiaah thei lo a ni.

Bible-in a sawi angin mihring hi sual saa piang kan ni a. Chu sual siampha theitu chu pakhat chiah a awm, kan rin Lal Isua a ni a; amaherawh chu, mihring siamphatna hmanrua atan khi'ng kan sawi chungkua, kohhran, khawtlang leh ram khi Lal Isua'n a hmang thung a ni.

Thenkhatinmahni indah tha ranin pawolitik hi misual leh pamham ruallho luhna atan kan kian a; thenkhat thung chuan kohhran leh khawtlang rawngbatolnaa tel ve hman lo khawpin kan intibuain kan inngai hlu ve thungin a hriat. A tha ho rawng nia inngaite chuan ei leh bar rawnna kawngah kan hmanhlel em em vek a, mahni indah sang deuh al chungin kohhran, khawtlang leh ram rawngbatol hna thawktute selin, an awm dan tur kan duan sak vak vak thin.

Anilma takah chuan inrelbatolna tichhetute chu mi fel leh khirrho hi an ni.

Chutiang ni ve lo tura inchher chhuah kan tum a tul hle mai. Chhungkuain a tihur a ti ang a, chutiangan kohhran, khawtlang leh ramn a tihur a ti mawp mawp ang. Pakhatte kal peng pawhin than a tithu thei.

Chhungkua chuan kohhran kaltlanga Pathian bel tlat chungin mi a chher tur a ni a. Chumi rah chuan ram leh khawtlang a ngawng ang a, hmasawonna tak tak, rilru, taksa leh thlarau hmasawonna a thlen dawn a ni.

Branch YMA Office Bearer

<b>President</b> Pu HD Daniala 9863212083	<b>Secretary</b> Pu Lalremsiama Varte 9862327112	<b>Treasurer</b> Pu David lalrosanga 9436158962
<b>Vice President</b> Pu S. Lalthangliana 8787326114	<b>Assistant Secretary</b> Nl. Florence Zoremsangi 9612761781	<b>Financial Secretary</b> Pu Rotlingpuia 9862385193

Lockdown inkaihhruaina DM&R-in a hrilhfiah

Lockdown inkaihhruaina Clause I. D (1) leh Clause II (2) lirthei tlan dan tur leh zan curfew bawhchhia an awm avangin DM&R Department chuan District tin DC-te leh SP-te hnenah lehkha a thawn.

Clause I. D(1) "Zan dar 7:30 leh zing dar 4:30 inkarah pawn chhuah khap tlat a ni. Hemi atan hian District Magistrate te'n Section 144 CrPC tlawhchhanin inkhuahkhirhna thupek an chhuah ang. Hei hian COVID-19 kaih hnawiha duty te, phai atanga bungraw phur motor in-unload, chhiat tawh thil leh medical emergency-a LLTF/ VLTF te'n District Magistrate-in thuneihna a pek dungzuia phalna an pek te a huam lovang" tih a ni a.

Clause II (2) "Lirthei intlanchhawk hian law & order duty-te lirthei, COVID-19 duty atana Sawrkar hnathawkte lirthei hman, ambulance, medical/ veterinary emergency atana motor hman te, essential services (AMC hnuiaia bawlhhlawh paih, bawnghnute phurh/ semna, P&E line duty, PHE tui sem, chanchinbu sem, LPG delivery, dak sem, adt.) a tana motor hman te, print & electronic media mi te motor, Kohhran hminga motor register-te, mahni veng chhunga LLTF duty-te lirthei, khaw kar bus leh maxi cab service-te a huam lovang" tih a ni a.

Heng clause pahniha inziak anga khuahkhirh ve loh 'exempted' -in a huam mi thenkhat te'n mahni mimal paw haia chhuahvah nan remchang an la nia hriat a ni a. Exemption pek an nih chhan hi mipui nitin mamawh 'essential service' a khaihlak loh nan leh mipui phurit tizangkhai tura loh theihloa hna thawh ngaite tana tih a nih laiin he clause hi hmang khawlo an awm nia hriat a ni.

Private hospital-a thawk doctor leh staff te pawh order no. B.13021/113/2020-DMR/Pt July ni 20, 2020-a tihchhuah hmangin exempted list-ah dah an ni a. Doctor leh Staff te duty-na tur atan

CYMA hmalakna

25.7.2020 : Sub-Hqrs. YMA thar din tur chungchangah Study Group ten Hnahtialah Group YMA hruiatute nen inkawmin hun hman a ni a. Prof. Lalnuntluanga, Gen. Secy; Dr. Malsawmliana, Asst. Secy leh CEC-te Pu R. Lalingheta, Pu Peter Chhakchhuak leh Pu J. Lalsailova te an kal.

27.7.2020 : Pu Bikram, Asst. Commandant, OC 19 FIT (Assam Rifles) chu Central YMA Office-ah a lo leng a, Pu J. Lalsailova, CEC-in a lo dawngsawng.

29.7.2020 : Conference Hall, Directorate of Land Revenue & Settlement Deptt.-ah Land Revenue & Settlement Deptt-in Citizen Charter rintlak a buatsaih tur atana Draft Citizen Charter chungchang sawihona meeting neih a ni a. Prof. Lalnuntluanga, Gen. Secy leh Pu Roneithanga, Fin. Secy te an tel.

- DC Conference Hall-ah 'District Level Standing Committee in Connection with Final Publication of Village/Local Council Electoral Rolls, 2020' meeting neih a ni a; Dr. Malsawmliana, Asst. Secy a tel.

31.7.2020 : Secretariat Conference Hall-ah 'Executive Committee of Mizoram School Education Society, Samagra Shiksha, Mizoram' meeting neih a ni a; Tv. Lalhmachhuana, Vice President a tel.

(Phek 1-na a mi zawmna)

3. I Bank registered mobile number-a OTP lo thleng chu tumah pek tur a ni lo. I pe hlauh a nih a, i account atanga pawisa a bo chuan, Bank pawhin an hmuh letsak thei lo ang che.
4. Bank-in i ATM card number, CVV (ATM Card hnunglama number) leh OTP an dil ngai lo. Mi tuin emaw an lo dil che a nih chuan, Police hnenah i report tur thu hrilh ang che.
5. ATM i hmanin, a hlawhtlin (success) loh chuan 'CANCEL' hmet thin ang che.

chauh tlanloh nia tlan phalna sawrkarin a pe tih DM&R lehkha chuan a sawi nawn leh a ni.

DM&R chuan he inkaihhruaina hi mipuiin tha taka an zawmna tur leh exempted list a tel te'n dan dik taka inkaihhruaina an zawm theih nan hma la turin a hriattir a ni.



(Thu ziaak Huang)

**MANGANNA CHAW***Remmuana Chawngthu.*

Isaia 30:20,21... "Lalpa chuan manganna chaw leh hrehawmna tui pe che u mah sela, in zirtirtute chu biruin an awm tawh lo vang a, in mitin in zirtirtute chu a hmu zawk tawh ang." "Isaia bung 30 thu kan chhiar chuan, Pathianin a mite mal a sawmsak tur thu, thu chhiar nuam leh ngaihnawm deuh mai kan hmu a. Manganna leh hrehawmna namen lo hi kan chungah lo thlengin, chutiang thil chuan min chiam buai fo thin mahse, min vengtu chu englai pawhin kan chhungah; kan zingah a awm tlat a ni.

Pu KL.Liana leh Pu Kawlkunga Kawlni te ropuina ramah: "Tun hnai-ah ka mi duh em em pahnih kan vui liam leh tlat mai, a va paw em! Hun harsa leh khirh zual lai taka hetiang mi thate an han liam leh zel hi, vanduin a thua bik tlat a ni.

Mi dik leh rinawm, taima baw si, dikna chu thian tha bera neitu niawma mawi; hlemhletna leh pamhamna sualin a bawh buai ve loh, mi dik lote thamna tam tak pawh hnawng ngam khawpa huaisen, kan chhuanvawr em em mai; thu leh hla tha tak leh ngaihnawm tak tak min hlui thintu, Pu KL Liana'n chatuan ram min lo pansan tlat mai a, ka ui hle mai.

Chutih laiin, tun hnai teah, ram leh khawtlang tana tha leh zung nasa tak lo seng tawhtu, a bikin Lunglei tana ngaihtuahna nasa tak sengtu, Pu Kawlkunga Kawlni chuan beisei loh takin chatuan ram min lo pansan ve leh baw a, a va paw em! An kalsan tak an chhungte Lalpan awmpui zel rawh se.

Kan khawvel hi heti vel nawk nawk hi a ni rih mai si a, ka duh tak leh kan la thlakhlelh em em ten min kal bosan zel a. Dam taka khawvela kan la chen ve reng chhung lahin, harsatna, mangan leh thlabarna, buaina hrang hrang ten min la luhchilh hrep zui leh a, a va han hahthlak thei nawk nawk tak em!

Mahse, hetiang tawng tur hian lei mihring zawng zawng hi buatsaih vek kan lo ni awm e. Thil mak leh hahthlak niin ngai thin mah ila, ngaihtuah chian chuan thil thleng tur ve reng a lo ni zawk si.

Pathian thu kan chhiar chuan, Joba chanchinah baw hian inzima leh entawn fo tur thil tam tak inphum a awm zual bik thin a. "Hmeichhe hrin tawh phawt chu rei lote dam, buainaa khat a ni. Pangpar angin a lo chhuak a, a vuai leh a, hlimthla angin a thlawk bo va, a awm hlen lo." (Joba 14:1,2) tih thu kan hmuh hi. Hmeichhe hrin tawh phawt chu buainaa khat tur kan lo nih reng chu mawle, chu mai a ni lo, rei lote dam tura tih kan lo nih hrim hrim baw chu mawle. Pangpar anga lo chhuak, vuai leh si; hlimthla anga thlawkbo nen tehkhin kan lo ni, keini mihring te hi.

Mahse, a hun a lo thlen meuh chuan e. Eng anga ringtu tha leh fel, tuarchhel tak nia lang pawh hi harsatna leh manganna tak takin min han thlen chilh meuh chuan "Ka tuar thiam lo, parte," tih hla ang deuh hi a ni ber e. Tawrh a har ngat ngat thei hle zel chu a ni e. "Ringtute tan chuan harsatna hi kan chaw tak a ni." tiin, hmun ralmuang leh thamuang taka awmna hmunah han sawi piap piap zel thin mah ila. Harsatna tak tak chuan min han den chilh tak tak a le, kan lo nasa lo teh mai thin asin le!

Ar-pui leh mu-vanlai thawnthu: "Kan naupan lai hian (han ti ve khanglang zel ila..) Makedonia chanchinbu ka chhiar peih hle thin a. Naupang pual hian thawnthu tawi an lo dah tel thin a, chu chu kan chhiar chak thin hle zel a ni. Chutih hunlaia thawnthu pakhat ka rilrua lo thar leh chu "Arpui leh mu-vanlai thawnthu" kha a ni.

Kha thawnthu kha tawi fel deuhin tihian sawi ta ila. "tum khat chu pasaltha pakhat ram vakin muvanlai bu a hmu a, a tui a lo awm teuh a, pakhat a la a; an inah hawn a, an arpui tui awp lai kha a awp teltir pek a, a lo keu ta a. Arpui chuan a note a hruai rual chuan muvanlai note chu a hruai tel zel a. A lo len hnu thlengin ar rilru ang kha a put tlat avangin, rannung lian deuh, Sazu te, rul te a hlau em em thin a ni. Muvanlai rilru ang kha han pu chiah sela chuan e, rul leh sazu te kha chu a chaw tui tak tur a ni dawn a, hlauh a hnekin a tham bet anga, a ei daih mai dawn a ni." tiin... "Hetiang deuh hi a ni, ringtu tam tak kalkawng pawh hi. Harsatna leh hrehawmna namen lo lo thleng thin hi ringtu dik tak chuan CHAW tui takah a hmang thiam a, lungawina nen chhel takin a pal dai mai thin a ni.

Ringtu inti tam tak chu ringtu dik tak anga an awm loh chhung chuan an chungah harsatna leh buaina a lo thlen vele, an hlauin an khur a, an phili ruai a, chakna an neih te an hloh vek thin a ni.

Mihring kan lo pian chhuah a, kan han tap nghal ringawt hian hringnun kal zel dan tur a tifi ah hle, kan damchhungin hlim reng tur leh nui reng ringawt tur kan ni lo a ni tih hi a hriat reng mai. Vawiina mi hlawhtling leh chhuanawm, hmun sang taka ropui taka leng te hi an hringnun bul chu a khirh ve hle tih kan hriat kha. Vawi tam tak hlawhchham a, vawi tam tak lo tap tawh an ni. Mahse, harsatna tam tak, harsa ti tak chungah lo pal hram hramin tun dinhmun an lo thleng a ni. Hetiang mite nunah hian zir tur leh entawn tur a tam bik hle a ni.

Vawiinah hian kan thinlungah, he thu hi lo nung thar leh sela, harsatna leh manganna tam tak lo thleng hi ringtu dik tak kan nihna anga lo hmachhawn thei turin kan rilru leh thlarau nun inbuatsaih thar zel ang u.

Mother Teresa chuan, "Natna/harsatna kan tawh hi Pathian min fawhna a ni." a ti sam et mai a, a ngai thutak duh lo.

Harsatna ngam a hneh zel thei turin Lalpan chakna thar min pe zel rawh se....

**NEXTCOMM ISP**

Nextcomm Internet Service Provider-te chuan Internet chak tha, hman zawh ve theih loh chu Khuangpuilam veng chhung a hman theih turin FTTH(Fiber to the home) in a rawn lut ta. FTTH hi khawchhia, khawdur leh boruak inthlak avangin a muang ve lo a, Wifi, Smart Phone, Laptop, Desktop Computer leh Tv ah-te a hman theih.

Hrechiang duh chuan a hnuai a contact No. ah hian zawh chian theih reng a ni e.

(4-3)

Contact 9774746112/8974201386

**Zirlai bu hi thiam tura kawng kawh hmuhtu a ni a, thiamna tak tak chu a zirtu mihringah a awm thin.**

**INDIA NATIONAL EDUCATION POLICY, 2020**

Prime minister Narendra Modi kaihhruai union cabinet meeting chuan Nilaini khan National Education Policy (NEP) thar a pawm a, Human Resource Development (HRD) ministry pawh Education Ministry-a thlak a remti bawk.

Indian Space Research Orga-nisation (ISRO) hotu hlui K Kasturirangan kaihhruai panel chuan nikum khan union HRD minister Ramesh Pokhriyal Nishank hnenah NEP thar draft hi an lo thehlut tawh a ni. He policy thar chungchangah hian ministry chuan stakeholder hrang hrangte thurawn a lak hnuah a pawm ta a ni.

National Policy on Education (NPE) hi sorkar chuan India ramin zirna lama hma a sawn leh zual theihna tur atana a ruahman a ni a, he policy hi thingtlang leh khawpuia elementary atanga college thlenga hman tur atana siam a ni bawk.

Kum 1968 khan prime minister hlui Indira Gandhi chuan NPE hmasa ber chu a tlangzarh a, a hnu kum 1986 khan prime minister hlui Rajiv Gandhi chuan puang ve lehin, kum 1992 khan siam that a ni. Hun rei tak ennawn tawh loh a nih hnuah, Nilaini khan union cabinet meeting chuan National Education Policy (NEP) thar chu a pawm leh ta a ni.

Education policy tharin a tarlan te chu -

- 1) Pre-school atanga secon-dary level thlenga naupang school kal an tam theih nan he policy thar hi siam a ni a, kum 2018 khan Gross Enrolment Ratio (GER) chu 26.3% a ni. Kum 2025-a Gross Enrolment Ratio (GER) a naupang inziak lut chu 50% a tihsan tum a ni a, kum 2030-ah chuan 100% a tihsan hman tum a ni bawk.
- 2) NEP 2020 hian India rama naupang vaibelchhe 2 velin school an kal theih dan a ruahman a ni. Co-curricular leh extra-curricular area then hran ni tawh loin, subject zawng zawng - arts, music, crafts, sports, yoga, community service-te pawh huam vekin, curricular-ah telh vek an ni tawh ang.
- 3) Early Childhood Care & Education-a School kal hun chhung kum atana hman thin 10+2 system tih chu 5+3+3+4 system-a thlak a ni a, naupang kum 3-8 inkar chu pre-school/Anganwadi emaw class 2 thleng an kal hun chhung tur biktuk a ni. Naupang kum 8-11 inkar chu class 3-5 an kal tur anga chhut leh a ni a, kum 11-14 tan class 6-8 ruat leh a ni bawk a, kum 14-18 inkar tan class 9-12 an zir hun chhung tur bituk leh a ni.
- 4) NCERT chuan naupang kum 3-8 te tana hman tur Early Childhood Care and Education for National Curricular and Pedagogical Framework (NCPFECCE) a duang dawn a ni.
- 5) Class 3,5 leh 8 zirlaite chu exam hmachhawn tir an ni dawn a, class 10 leh 12 chu a pangngai angin board exam kalpui leh tho tur a ni. National Education Policy (NEP) tharah hian Right to Education Act 2009 chu naupang kum 3-18 huamtir a ni dawn a, a hmain he policy hian kum 14 chin chauh a huam a ni.
- 6) National Assessment Centre thar, PARAKH (Perfor-mance Assessment, Review, and Analysis of Knowledge for Holistic Development) chu din tum a ni.
- 7) NEP hnuaiah hian zirna lama hnufual kuate chu Special Education Zone-a dah tur leh Gender Inclusion Fund siam tum a ni.
- 8) Day boarding school-te tan state/ district ten Bal Bhavan chu an din theihna tur ruahman a ni a, hetah hian art lam hawite, career leh thil dang dangte naupangte chuan an zir thei dawn a ni.
- 9) Kum 2022-ah National Council for Teacher Edu-cation chuan NCERT, SCERT, teacher leh expert organisation-te rawn chungin National Professional Standards for Teachers (NPST) a duang ang.
- 10) State/ UT-te chuan State School Standards Authority (SSSA) an din dawn a, stakeholder-te rawn chungin SCERT chuan school Quality Assessment and Accreditation Framework (SQAAC) a siam ang.
- 11) Zirna sang zawka kalte tan, research lama hma an sawn theih nan National Research Foundation din tum a ni a, higher education institution (medical and legal college tiam lohin) tan Higher Education Commission of India (HECI) siam tum a ni.
- 12) Public leh private higher education institution-te chu a hma ang regulation, accreditation leh academic standard te chu hman tir zel an ni ang. Dan pakhat hnuaia khaikhawm an ni.
- 13) National Curriculum Framework for Teacher Education, NCFTE 2021 tur chu NCERT rawn chungin NCFE-in an siam ang.
- 14) Kum 2030-ah chuan zirlaite zirtir thei tur qualification chu kum 4 zir B.Ed. degree nei an ni tawh tur a ni.
- 15) National Scholarship Portal chu zirlai tam zawkten scholarship an lak theih nana ennawn tum a ni.
- 16) Online education pawh uar chhoh tum a ni a, E-course siam tum chu regional language-a siam tum a ni. Hemi atan hian digital infrastructure pawh ngaituah chhoh zel tum a ni a, virtual lab pawh siam tum a ni. National Educational Technology Forum (NETF) (autonomous body) siam tum a ni bawk.
- 17) NEP chuan Pali, Persian, Prakrit, Sanskrit leh India rama tawng hrang hrangte tih hmasawn a nih theih nan Indian Institute of Translation and Interpretation (IITI) leh National Institute (or Institutes) din turin rawtna a siam.
- 18) MPhil programme tih bo tawh tur a ni a, univer-sity leh higher education institution-a lut turte tan common entrance exam buatsaih tum a ni. Undergraduate, postgraduate and PhD level chu interdisciplinary-a dah an ni ang.
- 19) Class 5 thleng mahni pianpui tawngin naupangte chuan an zirlai an zir dawn. School syllabus tihltlem tum a ni a, core concept chauh zirpui tawh tur an ni. Class 6 atangin vocational education a awm tan ang.
- 20) Report card chu exam-a naupang mark leh statement ziah lanna atan ringawt ni tawh loin an thiamna (skill) leh an theihna lam hawi zawnga report card chu siam theih tawh tura hmalak a ni.
- 21) HRD ministry chuan a subject azirin zir tur chin a bithliah dawn.
- 22) Ram chhungah affiliated college hi 45,000 chuang an awm mek a, hei vang hian college-te hnenah under graded autonomy, academic, administrative leh financial autonomy chu an performance atanga pek tum an ni.